

四庫全書

集部

欽定四庫全書

宗子相集卷八

明宗臣撰

七言律詩

同余德甫王元美夜集明卿得何字

長安花落奈春何
夜夜春亭載酒過
駿去難逢燕市骨
鳳哀重聽楚狂歌
青天短髮垂今古
明月孤笳散薜蘿
醉後莫言歸騎晚
浮雲猶自滿關河

天壽山一首

匹馬千峯曉度關相逢俱是紫宸班
帝宮閭闔開今日天柱華夷見此山
萬里鴻歸滄海路七陵龍護白雲間
漢家原廟松楸古夜夜西風吹珮環

送劉武庫使雲中便道還楚

使君西問玉關遊關吏應知紫氣流
三晉暮雲傳漢節七陵斜日攬吳鉤
馬迴塞北青楓老人到湘南紫橘秋
一醉洞庭明月裏可能不動薊門愁

送黃先生之江西

帝城楊柳何陰陰送客城南傷客心
片帆斜掛九江碧
明月一眺三楚深
叔度西遊竟何意
梁甫日暮空苦吟
高原忽憶美人遠
愁見滿山楓樹林

寄贈子培赴試

秣陵佳氣即蓬萊
湖上孤帆幾日開
謝草常生康樂賦
吳雲重見士龍才
鵝鸕新翼江風起
鴻雁天書秋色來
萬里風烟頻極目
遲君匹馬郭生臺

張肖甫初至七夕同諸子酌之張園

細雨林塘花氣流長安片碣即丹丘羣公解佩山雲起
七夕開尊桂樹幽玉杵聲殘河漢語紫簫吹落薊門秋
乾坤此會誰能負吳楚兵戈日日愁

同元美夜集明卿值雨

秋雲此日滿長安那肯相逢不夜闌風雨驟隨雙騎到
薜蘿况對一尊寒愁心獨有中原在俠氣君從北斗看
戎馬關山餘涕淚十年空負漢庭冠

送嚴博之浙

憐爾頻年任道塗又攜雙屐下江湖
向人白髮時時短
作客青山夜夜孤
賦裏秋雲迴雁蕩
愁邊明月失龍珠
燃藜起草聲名在
未許嚴陵問釣徒

送張肖甫奉命督租閩粵

高天落日照中原
匹馬凌風出薊門
赤羽頻年荒稼穡
蒼生何處問雞豚
七閩雨雪王程急
百粵樓船帝使尊
長孺不妨仍矯詔
寬租曾識漢庭恩

武夷西望即羅浮
南斗雙垂寒不收
使者珮環青桂色

山家鐘磬赤霞流
投鞭滄海龍堪起
掃石天門鹿並游
知汝未能深結隱
乾坤烽燧使人愁

答明卿齋居見贈

紫微夜燦建章開
聖主親祠太乙迴
禁月千門龍馭肅
宮雲五色鳳笙來
金莖秋落仙人掌
白雪歌殘楚客才
莫謂汾陰能獻賦
漢皇當日問蓬萊

寄于鱗

請郡當年意若何
使君猶自滯關河
客游五馬黃金妬

書去盧龍白雪多千堞戰烽迷碣石萬山落木下滹沱
建章遲爾朝天者芳草春雲聽玉珂

與明卿對月得山字

與君共拾長安月照我千秋壯士顏中夜玄猿猶自泣
西遊黃鵠幾時還玉闕戍客仍刁斗石室仙人空珮環
便欲乘風凌汗漫浮雲何處是天山

送許先生之任

南去孤帆逐塞鴻一尊寒雨薊門東曳裾鄒客明珠在

作賦梁園白雪工
日落瀟湘尋太岳
秋高荆楚過新豐
長沙不必嗟留滯
賈傳聲名自漢宮

送人之河南

匹馬翩翩不可留
垂楊醉色滿神州
千年詞賦人遊洛
十月關山雪滿裘
翠壁天開中嶽色
黃龍日抱大河流
知君萬里中原思
不到長安舊酒樓

送朱邑博之滎陽

當年赤帝困滎陽
使者黃金計獨長
一自關山盟白馬

千秋楚漢只垂楊君今忽向大河曲懷古行歌明月光
華髮傳經知不恨相如詞賦重遊梁

徐子與至京夜集

去年握別贈江蘼今日相逢又桂枝越使樓船羣盜出
漢家簪紱五陵悲關山烽起秋仍急鵙鵲雲寒夜不垂
莫向天門歌白雪人間楚曲正堪疑

再集子與得山字

七首寒霜照客顏相逢俠氣滿燕關荆軻西去此其輩

金定四庫全書
卷八
易水東流不可還
天地只今飛赤羽
江湖何處問青山
悲歌忽憶行藏計
為爾雲霄愁珮環

寄贈姜使君二首

搖落西風舊紫貂
一朝歸去逐山樵
郡中旌旆愁相失
道上豺狼任自驕
三楚白雲停涕泪
九江秋月卧蘭苕
北來父老頻相問
或有徵書自聖朝

傲吏當年罷節旄
西風卧病廣陵濤
空亭獨對開名酒
落日相看贈佩刀
彭澤千秋樵徑在
匡廬昨夜客星高

爾家最近瀟湘渚莫為時人著楚騷

送卞從事之廣東

長安落日照華纓君去才高從事名
匹馬關山衝薊雪五羊人吏識江
旌署中夜嘯芙蓉暮海上春衣翡翠
明驛使廣陵如可到梅花今滿粵王
城

送唐參政之山西

搖落西風舊漢冠當年奏草並琅玕
朝辭燕甸清霜潤春到龍門朔雪殘
行省紫薇羣吏夕嚴關赤燧萬峯寒

使君頻擁旌旄出多少瘡痍夾道看

同諸子夜集德甫

華陽之館雲參差誰其召我金屈卮出門寒月一何白
握手明星莽欲垂有客自負鸚鵡筆為君獨把珊瑚枝
相逢今夕且意氣世路風塵安可期

送玄陽山人歸吳

高楓搖落薊門遊把酒青天夜倒流世路百年孤鳳曲
霜華十月滿貂裘去燕寧為黃金盡過趙誰能白璧留

君到故園春草暮姑蘇麋鹿正堪愁

同子與明卿元美席上賦別于鱗得雲字

使者衣冠凌紫氛五陵春色坐紛紜中原獨灑蒹葭淚
落日相逢猿鶴羣永夜列星垂薊野西方千騎亂邊雲
太行咫尺愁風雨何處晴虹可贈君

送王比部之呂梁

南望黃河亦壯哉呂梁之水如奔雷飛流萬里崑崙下
急峽千峰日夜摧漢署君為滄水使徐方人識濟川才

登臨莫作觀濤賦恐有魚龍處處哀

席上同明卿送孫子升得春字

二月逢君帝里塵一尊且為駐征輪長卿白璧誰留趙
季子黃金又去秦短劍不開閶闔雨孤舟猶及廣陵春
江門十里垂楊色莫把時名負釣綸

送趙子隆下第南歸

閶闔天高急暮笳一尊芳草又天涯短衣孤劍且辭國
駐馬聽鴻日憶家淮浦當年曾桂樹楚江三月正桃花

君歸好擬長楊賦豈向西風問釣槎

送李僉事入浙

送別都門金屈卮使君去矣問青驪劍分紫氣星辰在
裘上霜華日夜吹南去羽書猶未息中原豺豹爾何為
江頭諸將勞相訊百戰勲名孰肯垂

席上同子與德甫伯倫送別明卿給事赴謫豫

章得書字

席上賦

柳色千門照別裾片帆西去是匡廬洞中白鹿知誰待

醉後青雲任爾疎
落日蒹葭三楚客
高秋風雨九江書
漢廷多少夔龍在
獨有文園負子虛

元美自塞上歸
暫駐城西携酒出視

重來握手薊門城
落日悲歌淚滿纓
使者關山愁綠草
人家霜雪暗金莖
尊開片石雙蛟下
電走長松萬馬鳴
此夕相看不成醉
明朝白髮為誰生

同李伯承比部夜過况吉夫膳部得真字

席上

賦

陌上鳴珂散紫宸相逢意氣轉相親
清尊細菊堪銷夜走馬傳書易隔旬
九月衣裳同在客千江烽燧遠愁人
憑君莫灑憂時淚無數秋風白髮新

答方懋藩見贈

十年裘馬薊門烟一日逢君北斗邊
念我遙傳秋夜曲開函半是白雲篇
歲寒蘭芷猶堪結雪後琅玕倍可憐
聞說詞臣俱近幸揚雄何日賦甘泉

九日陪祀山陵二首

九日山陵木葉丹北來秋色抱長安天開紫極羣龍起
月照蒼梧萬騎寒絕壁正當邊馬路西風不落漢臣冠
青萸黃菊年年事誰擬今從北斗看

捫蘿直上最高頭萬里蒼茫生客愁白露衣袍千嶂夕
紫微環珮七陵秋月明遠塞知師遁風急長楊恐帝遊
天末彩雲如有意至今常傍翠華流

大雪張助甫席上同子畏賦得胡字

一夜西風吹大都相逢朔雪滿長衢衝泥匹馬時時立

入座寒雲片片孤，萬里長途驚白髮。千山一望斷蒼梧，
可憐漢卒無衣者。猶自持戈拂曼胡。

送萬公子歸豐城

青袍綠髮儼琅環，歲晏趨庭去任難。帝苑佩聲天外盡，
豐城劍氣斗間看。尊前明月雙鴻暮，江上梅花一騎寒。
共說甘泉能獻賦，春風明日滿長安。

和朱主客冬至雪後早朝

茲年茲夕又春陽，千騎朝天總建章。金馬並搖蒼佩入，

銅龍高傍紫微翔
斗間雲氣垂鳩鵲
池上星華滿鸛鷺
何處詞臣歌白雪
知君此曲自三湘

寄贈王侍郎時總戎薊鎮

相國提兵驅紫氣
年來羽檄罷紛紛
千峯夜戟吹邊雪
萬里秋笳斷薊雲
驃騎長呼遼左戍
單于三折漢南軍
麒麟錯落尚書省
青鬢歸來奉聖君

待元美不至同吳峻伯席上賦

塞上音書胡不傳
遲君明月幾嬋娟
袖中芳草寒相負

馬首梅花春自憐，孤角千家滄海戍。故人雙鬢薊門烟，
塞帷莫訝星辰亂。知我行吟入斗邊。

况吉夫席上留別高伯宗吳峻伯汪正叔李伯
承張子畏諸君得西字

相逢春草忽萋萋，何限離情落大堤。楚客朝來歌白雪，
奚奴星下問青驪。一尊明月愁環珮，孤棹晴雲入鼓鼙。
縱有武夷秋可寄，天風不到薊門西。

上巳夜汪正叔宅留別諸君得寒字

三月三日開春盤入門解珮聲珊珊晉人曲水空芳草
楚客征衣自澤蘭明月萬家沉鼓角銀河千尺墮闌干
酒酣莫遣離歌起滿目江湖風雨寒

答子與見贈

建章風雨怨春芬即有梅花難寄君容計艱危羣盜在
主恩流落七閩分古來詞賦悲玄草亂後江山斷白雲
莫羨幔亭霞石曉恐應先駐伏波軍

扁舟憶爾阻江濤江上憑誰問楚騷碣石空摧雙鬢短

武夷曾憶片雲高
芙蓉歲暮堪垂綬
颺山深有佩刀
聞說烽烟今滿眼
可能一慰聖躬勞

夏日得袁二丈書

浮雲望斷滄海邊
尺書西來誰與傳
眼前盜賊至今日
賦裏江山非昔年
清世何人洗兵馬
孤城有客愁烽烟
紫芋黃菊漫消息
秋風欲上湖東船

又得袁三子敬書

別君已是三載餘
歲歲梅花空泪子
千江盜賊偶停騎

金定四庫全書
卷八
六月鼓鼙還寄書窮途青眼憶阮籍茂陵病肺愁相如
天時人事且杯酒他年遲爾承明廬

與徐養浩湖泛

湖上扁舟今又歸湖南生事日且微白蘋盈把客携酒
青薜滿山吾製衣烽燧秋高淮海路兵戈天急射陽圍
滄江何限垂綸者搖落西風舊釣磯

短笛長簫何處船草堂只在太湖邊蒹葭十里吹晴雪
蘆荻千村生紫烟世路關心羣盜在茂陵多病一尊前

子雲自有長楊賦肯向青山獨草玄

贈陳隱君

有客有客歌采薇六十翩然華髮稀
桃花千世憶秦水
蘿薜滿山裁楚衣石上黃精歲歲長
爐中白雪時時飛
崑崙玄圃好同往鴻鵠天風歸未歸

句曲道中值雨時赴子與之約

垂楊孤騎出江門西望鍾山帝極尊
萬里浮雲摧短劍
千峯秋色起中原及時風雨一何急
入夜蛟龍任自翻

不分南州徐孺子華陽三日獨開樽

少文自昔耽卧遊徐卿東來何所求
穿雲漱石不知暑
碧草青蘿今始秋
大風欲拔衆山去
驟雨如決千江流
明日峯頭弄笛者
高歌能不生我愁

積翠亭子與晚酌

華陽風雨晝冥冥
一日登山秋滿亭
洞口高松垂地暗
尊前古壁插天青
千巖積雪照吾酒
萬片浮雲吹客醒
莫怪烟霞莽搖落
峯頭今夜卧雙星

與子與登茅山絕頂風雨驟至

並騎華陽踏紫氛
振衣今日謁茅君
石門曲閉仙人掌
天柱高留帝女雲
萬里江湖秋不斷
二儀風雨晝難分
山中瑤草如堪問
吾欲常隨鹿豕羣

既別子與憶之

華陽十日醉不醒
華陽一別天冥冥
眼底烟雲失萬象
向來風雨迷千靈
捫蘿到處坐石壁
走馬忽然開翠屏
江國美人去已遠
誰與玩此芳草青

登觀音山

一上孤峯破大荒
吳山楚水共蒼茫
雲間棟宇垂天渚
江上龜鼉吹石梁
絕壁晝開風雨色
斷虹秋掛薜蘿長
吾將從此尋瑤草
黃鵠天風好共翔


登俯江亭

帝城秋色逐人來
吳楚東南首重回
風起大江龍抱石
日高天柱客登臺
一尊芳草晴相媚
十里芙蓉秋未開
酒罷忽歌湘水曲
浮雲何處不堪哀

過涇訪王九江二首

二十年前讀子虛茂陵今得謁相如
秋來萸菊頻携酒
病起江山獨著書
四海蒼生憂戰伐
中原高士困樵漁
武夷有約休相負
歲晚芙蓉日夜疎

一尊秋色起蒹葭
涇水東流走白沙
黑髮孤臣悲去國
青雲兩世見通家
幾人江上貽芳草
九月山中問桂花
安得淮南賦招隱
與君終日弄烟霞



宗子相集卷八

欽定四庫全書

集部

宗子相集卷九至十二

詳校官監察御史臣陳化龍

侍讀臣孫球覆勘

總校官原任中允臣王燕緒

校對官編修臣閔懌大

謄錄監生臣陸恩綬

欽定四庫全書

宗子相集卷九

明宗臣撰

五言排律

人日謝茂秦李于鱗徐子與梁公實王元美偕
集席上口占得風字

雪霽燕山北梅殘漢苑東客星開夕燕人日聽春鴻綠
鬢愁堪短青雲計未工年華雙鳥去歲事一尊同湖海
烽烟裏乾坤聚散中金花遙對月玉樹迥含風筆共江

淹俊途俱阮籍窮中原携數子去矣上崆峒

樓中閒望家君報已赴蜀矣即悵然有賦焉

登高心易折望遠思難窮萬柳風新碧千花雨較紅亂
山吹夕燧絕壁墮晴虹蜀道西南入荆門灩澦通獨將
華髮意長歎錦江中抱玉頻甘拙辭金久失工宦情摧
白眼歸思滿青楓早晚音書到闕心碣石鴻

傷春四首

歲華何荏苒芳草又參差雲斷關河色烽連楊柳枝羽

書千里急鼓角萬山悲紫陌紛相問黃塵失所之邊陲
頻聚散大將總安危多少關心事空將涕泗垂

雁塞燒焚後孤城水旱餘荒涼自我馬戰伐且閭閻赤
子瘡痍滿黃金貢賦虛星辰開將壘風雨急軍儲聖主
憂方切羣公計莫踈振衣空太息慙愧賈生書

北闕平臨漢西山迴接秦風塵偏作吏梅柳畏逢春盜
賊滄江起征輸赤縣頻生涯俱浩蕩世路正艱辛日月
餘愁鬢乾坤有病身何能遂倚劍祇自失垂綸

野濶時仍鳥山寒畫不花最憐簪冕客何事管弦家馳
馬去朝日登樓起暮霞青門懸萬里白髮阻三巴天地
方戎服江湖况使槎獨將留滯色惆悵對春華

同茂秦于鱗南溪泛舟

昔賢悲曲水今日俯長河路險難車馬橋荒先薜蘿亂
青來澗草新綠散渠荷千嶂尊中落孤槎天上過醉餘
燕市酒狂識楚人歌鴻雁飛何急琵琶恨與多雲留仙
客履日落野漁蓑風雨蕭然至吾如幽思何

送沈儀部子文之留都

送君春雨後把袂暮雲前
綠鬢同禁日青袍共住年
人言能拾紫吾意在談玄
漢苑長楊賦吳門折柳篇
才名時輩重世俗宦情偏
梓里今垂綬花巖昔問禪
橋從烏鵲入臺是鳳凰傳
早晚貽瑤草雙鴻遲北燕

病中二首

浮世豈非昔長愁直至今
風塵游子病藥草故人心
白日銷危坐青山入苦吟
簾窺新竹細臺惜落花深
畏路

甘名隱浮生肯陸沉獨將酬主念久矣負投簪

茂陵消渴夜漢圃倦遊年日月愁中惜形骸病後憐鄉
心時萬折客淚晚雙懸人老猶西蜀春歸尚北燕音書
嗟白雁歲序怪玄蟬獨抱無窮事徘徊玉漏前

送朱郎中使浙

鳳書天上至龍節日邊催兩越乘槎使三都作賦才路
經芳樹斷心逐暮江迴綠水樵人宅青蘋釣客臺山寒
金粟落巖靜玉華開月照方窮谷春深已却灰觀風尋

禹穴題石向天台多少長安侶看君奏草來

午日同李于鱗游天寧寺

得爾逃名者今辰又少林山高楊柳細路險薜蘿深古
塔已凋翠祇園曾布金談經羣鳥下聽法一龍吟舍利
光難滅菩提跡豈沉空虛能悟性清淨不依心雲竹窺
禪相風篁度梵音僧來看果結酒至對蒲斟世事形骸
苦浮生日月侵慈航如可渡同此謝朝簪

賦得邊馬有歸心

萬騎下青海三軍赴紫荊浮雲朝出塞細柳夜歸營漢
劍繁星陸邊笳落月驚千金投筆吏百戰棄繻生駿骨
淒烽火雄心老甲兵長堤遍芳草何處識咸京

病中茂秦見過

兩月文園病千門落葉聲客能携杖至誰復倒衣迎日
月朱顏失行藏短髮生芙蓉消渴採蟋蟀向愁鳴几上
分芝朮江間憶杜蘅青編妨吏事白雪損時名久卧知
朋好何才答聖明未應滄海路終負野鷗盟

寄魏山人

誰識忘機者當年削跡人
羊裘寧負漢龍劍不游秦
明月青藜杖秋風白鷺巾
江華能自主世故久相賓
玄髮三千丈浮生六十春
少微久寂寞今復在垂綸

聞陸子携家之金陵感而有賦

聞君棲海上何意赴江東
况復青袍舊其如白髮窮
龍蟠天府壯鳳去古臺空
日月悲歌裏關山涕淚中
賦成三楚遠名並兩都雄
書已留懷袖春難問雁鴻
相思南

去苦多難向來同漢苑
搗詞者看君慰轉蓬

送王中丞巡撫山東

聖主開皇極明公翊帝謨
朱衣持節紫詔錫恩殊
涕淚思酬國艱難任虜胡
兵戈千嶺急保障一身孤
豹畧雄三輔鴻聲照八區
燕幽方整轡齊魯復長驅
地入關河迴春迴草木枯
雲霄迎劍舄日月擁師徒
臺靜惟聞鳥山空不見狐
功名懷呂尚道術陋夷吾
海外寧干涸天邊望斗樞
還看麟閣上早晚列新圖

送宗四道大南歸

如何避世者對此薊門烟賈誼浮湘日長御授簡年畏
途殊慘淡末路遂迤邐雙鬢莽垂白孤悰惟問玄道遙
疑悟道清淨類逃禪跡豈漁樵隱名將鹿豕全紫霞隨
意好明月向人圓不得從君去羈愁倍可憐

送胡比部之留都

吾憶同遊日君今獨往悲朱華聿云暮綠酒不堪持雙
劍看星動孤槎卧雨進才名青瑣客吏隱白雲司鳳去

仙臺古龍蟠帝宇垂三山天浩蕩六代草參差

闕

張

衡賦澄江謝眺詞芳蘭如可折千里慰相思

湖上晨起

碧石高成削江流直浸園鷓鴣猶渚宿鳥雀已枝喧北
斗青天墜東溟白日翻秋聲起橘柚曉色出雞豚玉露
淒松逕高霞落石門漁舟忽停棹鬢鬢是桃源

喜雨劉沈許李四大偕集

千家迷曉日萬壑下秋陰地迴浮雲直亭高驟雨侵羣

鷗寒自立一水坐能深波動魚龍氣天流鴻雁音榮枯
芳草色憂喜故園心長嘯無賓主高談失古今開尊憐
阮籍作賦見陳琳豈作商霖望聊為梁父吟

趙山人再訪溪南

思鱸來釣者題鳳向山家樓入千村樹池開六月花停
杯去黃鳥掃石散朱霞白髮便幽事青袍駐歲華病惟
求杞菊語必及桑麻江水秋方潤還期泛夕槎

冬夜沈李陸禹盧潘諸文學同徐山人集芙蓉

館分得前字

客到孤城暮亭開萬水邊晴虹標野渡巖雪動平川吾
愛滄浪曲誰聽白石篇羣鷗驚落木孤雁下新烟楚澤
樵漁在吳雲涕淚偏一尊聊永夕雙鬢任催年春入寒
衣後歌傳夜漏前出門看嶺月任爾妬嬋娟

通州顧國子訪山中臨別成篇

相思曾漢苑相見此江城楊柳春山細蘼蕪夜雨生鳳
題今日字龍卧昔人名世事孤心在霜華兩鬢驚艱危

吾抱病流落爾何情作賦看霞墜開尊坐月明雙鴻睥
睨暮尺隴廣陵行莫忘滄浪水紅塵滿客纓

出訪陸長庚不遇

出郊頻繫艇築室不依山樵者千林下人家一水間巖
花春更碧渚草夕仍斑汝謂長逃世吾將共閉關豈乘
黃鶴去何意白雲還龍劍斗邊色漁竿石上閒玄芝應
自摘叢桂好誰攀惆悵當年語丹書次第刪

同何侍御遊大雲寺十二韻

寺在清源

驄騎中原下招提絕域邊黃金原布地青石正參天齊
魯傳杯外蓬萊落雁前沙平樓閣直路僻斗牛偏法有
玄猿聽經知白馬傳慈雲千嶺合慧日萬家懸樹結空
中果池開定後蓮晨鐘飄積雪夕梵度輕烟羣鳥頻窺
偈雙龍欲護禪陰陽悲茨砌今古慨桑田岱色東無盡
河流西可憐問君逃苦海何似賦甘泉

送萬彥和僉憲之廣東

為郎依北斗作賦重西京雲裏金莖詔愁邊滄海行星

文開鳳節秋色動羊城桂葉雙旌轉梅花列戟迎按章
孤島入攬轡曲江平紫氣朝看劍蒼梧夜勅兵迴風五
嶺振飛雨百蠻驚潮起魚龍偃珠來日月明羅浮高可
立溟渤遠能清吳楚干戈淚乾坤竹帛名縱橫粵王壘
慷慨漢臣纓萬里還相憶寥寥今古情

省中夜直

紫微朝散署玉珮夜分曹明月天河白晴雲漢闕高春
知催瑩英寒未却衣袍羽檄心恒折闕河首重搔世途

趨水火兵氣散蓬蒿流血滄江滿
燃眉赤縣勞誰人甘馬革諸將豈
龍韜嗟爾平夷畧空予賦楚騷

余德甫吳明卿夜至賦得虛字

羨爾荆高輩頻年燕市居悲歌人不問
擊筑意何如愁得尊前緩春從柳上舒
庭飛梁苑雪吾憶楚江漁寂寞思玄賦
蕭條諫獵書誰其鴻鵠志俗已鳳麟踈
兵革中原滿星辰北斗虛相看千古色
涕淚滿長裾

秋夜張園遇談玄者有贈

萬里秋雲下雙峯夜月初空梁寒蟋蟀曲沼亂芙蓉仙
路青芝隔玄亭古木踈浮生俱客計斯意久吾廬白雪
爐中藥黃庭石上書簫聲何處起鬢髯紫霞裾

夜過明卿遲元美不至得今字

楚客如看昔燕歌遂至今羣情宜鹵莽斯意轉蕭森狂
甚憐吾在愁來獨爾尋雙珠明月動一酌暮鐘沉天地
逢人少冠裳避世深窮途惟白雪失計自黃金詞賦偏
生色風塵易折心不知王子晉何處夜抽簪

秋夜高伯宗徐汝思李伯承汪正叔張子畏况
吉夫來集賦得難字

羣公何處至鳴珮各珊珊繫馬秋雲落張燈夕吹殘賓
筵惟首藉客贈有琅玕月照千門白星垂九塞寒雙鴻
迷碣石斗酒自邯鄲巖菊今逢紫江楓昨憶丹誰家龍
出笛吾計鶻為冠蟋蟀尊前度芙蓉句裏看吏情同去
住世路異悲歡他日思瑶草乾坤此會難

將發京夜別峻伯得湖字席上賦

握手殊不盡論心日轉紆更誰憐鳳鳥為爾繫驪駒
明月慘相照浮雲寒不徂客塗從浩蕩帝里只須臾豈為
蒼生出寧言壯士圖安危羣貴在去住二人俱君莫嗟
齊瑟吾將下楚巫椒蘭徒自結魍魎作人趨漁父何方
去靈均未可呼宦情餘棘莽生計久菰蒲黑髮從今變
黃金自昔孤敝裘辭北斗短棹入西湖倘遇尋秋色悲
歌問玉壺

宗子相集卷九

欽定四庫全書

宗子相集卷十

明 宗臣 撰

五言絕句

題畫四首

山徑度青波石門遲白日客到不披衣春風理瑤瑟
暮嶂遠含青春江空帶碧細掃風前花拋書枕蘿石
冥冥沙上鷗潔潔雲間鶴秋風厲羽飛空山驚寂寞
雨落千山南月照千山北山上把芙蓉蒼蒼動秋色

春望

聞道春可憐，春今竟何許。
石竹萬家烟，海棠三月雨。

送吳山人

黃菊故人杯，青山游子路。
匹馬向垂楊，回首燕雲暮。

聞雁憶子培弟

秋雨千峯散，寒雲萬里開。
不知天際雁，幾日故園來。

雪山

急雪冥冥至，玄雲黯黯垂。
青山亦白髮，莫怪鬢成絲。

聽笛

客有羌中笛十月吹楊柳楊柳不可見春色在君手

寄陸子

白鷺三洲遠青山萬樹低相思惟夢到夜夜鳳臺西

郊行六首

連騎出孤城揚鞭一相語楊柳遍春山應從何處去
去去城南路我馬忽以停知爾不行意春原芳草青
不識南溪路借問道傍子答言從此去桃花隔春水

昔聞南溪名今識南溪路去城不十里今我來何暮
溪上有雙橋一一龍鱗石白髮倚春風愧爾樵人色
高柳與新松鬱鬱滿前渡故園春不見見此故園樹

贈人之河汾

烏道下層雲龍門倚積石太平上書者曾是布衣客

送人還江南

行藏新白髮歲月舊青袍又向江間去秋風荔薜高

湖上雜言二十首

冥冥江雨飛冉冉江雲細何處見春華靡蕪滿幽砌
人自湖南卧春還湖上看桃花千樹落柳絮萬家寒
白髮持竿者江華坐晨日垂鈎勿太深恐落蛟龍窟
白雲有樵者携酒至山家春風好同來為吾掃落花
散步至西園草莽充庭際稚子好為除恐有草中蕙
荷芰滿橫塘出水一何長風雨莫太驟吾欲製吾裳
熠熠草間螢穿楊復入柳誰取向山房星辰四壁走
赤日涸大江家家泣禾黍如何千峯雲不作千峯雨

百花耀朝日日中常五色君看向日者惟有葵心赤
清風下滄洲冷然六月秋錯疑白石走乃是夜行鷗
山前摘松子山頭拾桂花月明聞玉笛秋色在誰家
幽人夜不眠松下倚寒石秋月落江潭千里湛空碧
千澗起秋陰萬山驚夕暝松風何處來悠然飄夜磬
明月下大川孤鴻依淺浦不見舟中人但聞舟中語
秋江一夜雨鱸魚處處多漁人走相約晨日理青蓑
秋雲下斷鴻暮雨鳴叢竹湖上一尊酒共酌寒波綠

風起萬林寒月出千峯白
門外蒼松影疑是卧龍跡
寒飈暗夕林中夜忽以朗
晨起開石門雪花大如掌
冉冉山上梅皎皎山中月
月下摘梅花幽香滿肌骨
白雪滿湖村夜深仍出門
湖邊千樹林一一玉龍蹲

得余德甫書

使者自南來投書報江渚
把讀滄波上蛟龍作人語
白紵好裁衣長短與身稱
豈無舊所著貴自故人贈

古意簡伯章

美人隔江洲咫尺不得渡不畏石上霜但畏草間露

懷高子明

作客清江遠傳書白雁遲山中有芳草遲爾把春卮

夜立

秋風天外聲明月江中影幽人把桂枝露下衣裳冷

遲養浩不至

山中白日遲湖上青春早美人不我期誰與玩芳草

寒夜同助甫訪子畏見盆草有歲寒之感焉遂

同賦之

長安十丈雪寒色滿荆榛惟君咫尺地留得故園春
十月見蘼蕪青青似春浦豈子歌陽春春色不敢去
百卉皆零落如何爾獨存豈無冰雪苦一意遲王孫
自與美人期芳草日轉碧今日凌寒者豈獨松與栢
已訝雪中在况逢燈下看酒闌相把贈疑是翠琅玕
席上送朱主客得蕭春青西四字

朔雪尊前亂西風馬上驕寒笳中夜起不似廣陵蕭

孤柝那堪夜垂楊不肯春白雲何處至吾欲贈歸人
雙樽行北斗一騎望南星春色隨君去蘼蕪日夜青
君到滄江上桃花亂馬蹄相思知有路明月蘄門西

張助甫席上同吳峻伯白伯倫再餞朱主客南

還賦得江飛競渡日草見踏青心十韻

席上

賦詩成三更矣

為惜美人去看梅到曉窓明河忽倒地疑已入滄江
朔雪寒無賴邊雲凍不飛海門波浪急莫使近春衣

夜夜歌陽春青皇失其柄君携瑤草歸蘿蕪孰敢競
君來楚水寒君去燕關暮黃河十大冰孤槎未可渡
郢客何方來為君鼓瑤瑟席上走楚雲杯中落湘日
孤鴻碣石西匹馬長安道王孫及早歸綠遍江門草
寒飈盡相憶悲歌夜相見斗室豈天台落盡桃花片
停杯問明月明月不能答相隨下江潭夜把蒼龍踏
一酌寒仍綠千峰夜失青逢君能幾日摘盡薊門星
北風送君去吹我故園心直掛廣陵樹春來亂鳴禽

臘月十七夜月同峻伯助甫席上賦

寒霜日夜驕吹破，薊門月月色幾時圓。待爾照春髮，得

月字

西風裂天荒，銀河翻巨浪。殘月東海頭，至今不敢上。得

上字

寒飈蕩月華，桂樹漸無葉。一葉落人間，變作階前莢。得

葉字

既喜明月來，復惜明月去。吾欲破青雲，坐爾月行處。得

去字

白伯倫儀部移居夜偕助甫司封訪之席上賦

得卜居赤甲遷居新兩見巫山楚水春十四

韻

席上賦登卷
漏下三鼓矣

客子騎明月主人開石屋銀河即爾家豈待成都卜

卧君白雲床讀君紫霞書桃花亂墜酒疑是武陵居

童子摘松枝敲冰煮白石萬里天風來吹作珊瑚赤

龍劍削芙蓉十載閉其匣壯士為爾開滿地走鱗甲

醉爾華陽館如登崑崙巔白雲一長嘯青山日夜遷
君試探玄草吾能把素書問奇頻載酒真作子雲居
朔雪不肯去客衣何處新尊前歌綠草愁殺薊門春
聞君佩玄珠明月中夜朗莫作江湖遊白日愁罔兩
美人隔江干咫尺不相見終日望秋鴻忽已來春燕
客言湘水至綠雨泣蒼梧恐是懷沙淚雙垂問大巫
問君何所愛庭戶滿西山夜夜夜仙人至時時拾珮環
夜呼洞庭君明月破三楚開門拾楚雲片片作人語

主人出家醅千酌葡萄紫不問江南人知是江南水
落月頻催酒羣星低送人向中楊柳色不是五陵春

贈吳張二子

望君白雲邊逢君明月下明月豈銀鞍去住隨君馬
自我遣明月終夜照君屋嬋娟未解情只在階前宿

宗子相集卷十

欽定四庫全書

宗子相集卷十一

明 宗臣 撰

七言絕句

送王比部元美使江南六首

蘄門秋草萬山青
送爾天風下溟瀆
紫氣從今蔽南斗
何人更識使臣星

千門羽檄正紛紜
搖落西風此送君
匹馬關山秋色裏
胡笳吹斷萬峯雲

北斗天門高自看銀河錯落滿闌干何當折贈秋江去
白露青楓夜夜寒

使者金羈控紫騮月明瑤瑟共登樓酒酣一鼓湘靈曲
天外星辰忽倒流

袖中雙劍削芙蓉到處秋雲幾萬重南去不須頻出視
恐令白日下蛟龍

大江中斷是金山山上瑤華爾獨攀明月天高秋萬里
何人不作弄珠還

塞上歌十首送王侍郎赴薊鎮

司馬頻年西破戎
詔書又下九華宮
親提萬卒如風雨
一夜來屯紫塞東

塞南塞北盡烽烟
邊騎縱橫二十年
報道今秋須遠徙
漢庭司馬日行邊

千里關山擁帝京
萬村烽火照連營
天高玉塞朝催戰
日落黃河夜勅兵

榆關北望陣雲高
五月天風吹戰袍
共說總戎王相國

十年身佩舊虔刀

揚旌出塞擊樓蘭把劍冰天萬里寒
紫氣憑陵邊月色
兩軍驚傍斗牛看

躍馬提戈佩紫貂漢關那數霍嫖姚
護軍飛將龍庭滿
縛得名王不敢驕

塞外羣山落日登黃沙縹緲白雲層
天連睥睨盤三輔
地坼龍蛇奠七陵

悲風搖落大荒迷白草黃雲散鼓鞞
直遣漠南無隻騎

燕然不羨漢臣題

白羽親成露布文
滿天愁色結寒雲
三軍盡賞葡萄酒
九塞傳歌虎豹羣

山前漢使尺書飛
山外邊兒匹馬稀
擊鼓吹笳醉霜月
今年無事著戎衣

再送王元美四絕

漢使朱衣塞上行
燕關落日照長纓
酒酣忽嘯青天色
坐使浮雲不敢征

吳鉤錯落白如霜
腰下龍珠夜月光
今日贈君春草去
一天風雨下漁陽

春風千隊簇芙蓉
白馬長驅似白龍
君到榆關歌出塞
萬家明月泣邊烽

太行斜壓萬峯低
北斗天門咫尺迷
爾去高歌逢五馬
白虹雙掛石梁西

送葉令之蒲圻

錦水曾傳茂宰名
分符又向武昌城
蕭湘春色隨君到

千里蘼蕪一夜生

停車無限楚山青
芳草春雲接洞庭
縱有瑤琴君莫鼓
萬家風雨失湘靈

贈余德甫奉使兩浙四首

天風匹馬向西湖
明月千家醉白榆
莫上釣臺聽夜笛
霜華吹破客星孤

赤城霞起是天台
明月簫聲落早梅
昔日胡麻君莫問
桃花不放石門開

秋雲鳴珮入金華
練眼仙人掃落花
無數石羊餐古雪
知君已到赤松家

雁蕩千峯插斗墟
彩雲終夜護丹書
月華萬片寒相逐
拾得天人白玉裾

得顧洛陽書却寄四首

長安風雨怨離羣
何處看梅不憶君
使者青函天外至
開書片片落嵩雲

七月垂纓出建章
蒨門秋草怨邊霜
相思化作長堤柳

一夕春風遍洛陽

洛陽城北春雲稠
洛陽城南伊水流
伊水泠泠去不返
千山萬山明月愁

青天直渡大河津
河上傳經煮白鱗
回首千峯桃李色

知君愁殺武陵春

顧子別業在
武陵溪上

送袁令之夔州

送君何處折梅花
南去關山多暮霞
漢吏由來能化蜀
馬前春色動三巴

春風二月到瞿塘
白帝城邊春草長
不必桃花滿千樹
他年人亦比河陽

寄陸長庚

江上茅堂倚石孤
清尊紫菊歲相呼
別來千里看鴻雁
明月愁心落五湖

得明卿書却寄二首

逐臣西去楚雲長
猶有音書到帝鄉
莫訝開函龍氣滿
知君六月過濠梁

憶爾秋風滿敝裘
計程應醉百花洲
如何徑作瀟湘去
洲上芙蓉日夜愁

酬朱大得蘿字

射陽湖上春水多
射陽湖北長青蘿
君歸莫向湖中卧
恐有蛟龍不得過

酬峻伯得屋字

山人十載出山屋
手把瑤杖騎白鹿
風雷一日走千里
雙龍夜夜愁天目

酬助甫得送字

白雲忽向黃河送黃河至今不敢凍
盡道河中走蜀龍
只今席上行秦鳳

相逢曲

千騎東來紫電生西風吹雪滿華纓
將軍且莫干恩澤
聞道單于未罷兵

酬助甫二首得楚拆二字

君昔驅龍下三楚湘妃漢女愁
江渚豈有高歌散白雲

至今老樹作人語

赤珠射斗牛欲拆相逢疑是鮫人宅忽然灑酒作江湖
明月長吹千里碧

題方懋藩邸中小石

仙人鞭石過滄溟片碣千秋落此亭昨夜白龍驅不去
天風吹出武夷青

明月曲同峻伯助甫席上賦得深字

飛來明月掛千林滿地霜華吹客心故國魚龍何處卧

白雲愁殺楚江深

得歌字

露下金莖吾自歌與君中夜踏天河可憐一片長安月
曾向江門照薜蘿

得書字

吾欲驅龍走太虛為君赤手摘蟾蜍天台三十六峯裏
何限仙人把素書

得虹字

薊門朔雪亂天風
風落千家走白虹
馬上月明揮不去
知吾夜夜醉新豐

新春贈李司封子藩用助甫韻

李白逍遙供奉班
高歌白雪向人間
未須採作長安曲
恐有青春不入關

綠玉仙人截海過
石梁千尺駕龜鼉
相逢贈我金光草
處處青山愁薜蘿

鳴環踏月拾嬋娟
雙劍驚逢北斗前
紫氣朝來垂馬首

何人不作五陵烟

海南巨浪抱羣星海上愁雲日夜停
豈謂芙蓉春不度
短簫吹破萬峯青

春風走馬玉華東
腰下明珠浸碧空
疑是羅浮山上月
為君終日控長虹

夜月懷明卿

逐客音書久不聞
天風吹斷楚江雲
相思惟有長安月
拾得嬋娟難寄君

處處青楓急暮砧萬山秋色怨瑤琴美人只隔湘江水
江上浮雲愁我心

正月十二日夜同助甫過李子藩賦得湖西二

字

杯中明月醉屠蘇南去晴雲夜可呼聞道五陵歌玉樹
家家拾得紫珊瑚

紫簫吹散夜烏棲萬戶春星濕馬蹄玉女霓裳知有曲
春風莫到帝城西

得子與書寄贈四首時子與駐節句曲

聞君遙住三茅峯峯上傳書遺白龍
携得江南春色到
開函飛出紫芙蓉

春雲控馬入華陽千尺晴虹跨石梁
倘遇赤松歌夜月
知君十日醉玄霜

何處高歌踏紫氛袖中瑤草白紛紛
夜深忽弄崑崙笛
驚破仙人五色雲

貞白祠前掃赤霞大江明月走晴沙
天風吹落陽春曲

散作千門楊樹花

寄贈方隱君六首

隱君家在九華山
夜夜春風吹佩環
雙袖白雲留不止
化為龍氣滿天關

碧溪之上何者磯
銀河倒夾青天飛
中流短笛弄明月
驚起玉鰲無處歸

日日騎雲向武夷
芙蓉千尺插天池
池邊白鹿春無數
叱向高巖耕紫芝

山中高卧六十霜青雲為珮霞為裳南溟六月赤虹起
羣仙跨之來翱翔

九鯉湖邊黃石家安期之棗大如瓜割來釀作崑崙酒
醉殺桃源萬樹花

洞簫吹破嶺雲高玉女峯前採碧桃三十六天風露冷
臨行解贈赤霜袍

峻伯夜過遲助甫不至各賦嘲之

邊雲片片亂邊霜匹馬東吹明月光何處美人期不至

漢家歌舞在平陽

席上留別高伯宗四首分韻

仙人掌上別金莖
露冷千家醉月明
天外武夷君莫問
春風無限薊門情

萬里江花拂石橋
孤槎去弄廣陵潮
雲中倘遇崑崙子
寄爾秦時碧玉簫

大江南去片帆輕
江上浮雲日夜征
回首帝鄉春色遠
萬家楊柳為誰生

振策天風下七閩當歌愧爾楚江人夜深忽鼓湘靈瑟
處處梅花愁遠春

月夜再別諸君二首

何處簫聲墜月明天風吹亂武夷情嬋娟萬里秋如水
吾欲乘槎問太清

露下金莖鳩鵲愁銀河倒逐綵雲流携君一片長安月
去醉千江白鷺秋

華陽明月曲同子與賦

月滿空山青不流
仙人來贈紫雲裘
一尊高卧藤蘿上
醉殺華陽萬里秋

百尺銀河叱作橋
看予直度赤城標
雲中雙鳳翩躚下
秦女何方弄玉簫

無數星辰檻外看
月中環珮近珊珊
天風忽送霓裳曲
搖落千峯翡翠寒

青天倒插石門高
夜半仙人獻碧桃
萬頃烟雲蕩松檜
為君山上起江濤

玉露清秋啼夜鳥
高空明月萬山孤
嬋娟忽墜珊瑚影
處處幽人尋白榆

月華萬片散天門
拾得清光滿客尊
醉起白雲如可駕
吾將乘此去崑崙

華陽道中奉別子與

三日高峯坐碧梧
西風明發問驪駒
袖中一片華陽月
贈爾揚帆過太湖

共持瑤草下天闕
萬里秋風吹別顏
馬上白雲晴不散

知君到處問青山

蕪湖遇陳山人鶴席上分韻贈之

江雲萬片落胡床
斗酒高吟明月光
一自逢君出玄草

滿天霜色似華陽

得陽字

白雁青楓楚客悲
相逢猶及桂花枝
萬山明月孤帆色

送爾江湖隨所之

得悲字

相逢秋色起蕪關
明月千峯未可還
莫怪征衣霞氣滿

知君家在會稽山

得還字

過采石懷李白十首

閶闔天門夜不闕
酒星何日謫人間
為君五斗金莖露
醉殺江南千萬山

憶君乘月下金陵
何處吳山不夜登
一曲瀟湘秋萬里
至今疑在白雲層

楚水秋風薜荔高
千帆明月大江濤
峨眉亭下芙蓉色
猶似當年宮錦袍

夜夜銀河倒不流
長虹西掛彩雲愁
醉來江底抱明月

驚落天門萬片秋

到處孤槎秋萬重
滄江終夜卧魚龍
天風驅盡瀟湘色
祇為仙人破醉容

秋山萬仞落秋潭
無限青楓好駐驂
君跨長鯨去不返
獨留明月照江南

采石磯頭坐白雲
歸來瑤草亂紛紛
夜深吹笛江亭上
明月窺人恐是君

楚江南折是天門
江上蛟龍日夜喧
為爾片帆開幕雨

至今秋色鎖雲根

短筇踏破楚山青
日日蒼梧醉洞庭
何事淹留姑孰水
千秋風雨怨湘靈

西望匡廬接九華
當年醉色傲烟霞
可憐一片寒江月
猶為千峯護落花

聞張山人在蕪湖不得見懷之

采石磯頭秋雨晴
蕪湖城外暮潮生
美人只在江波上
十里芙蓉愁月明

懷海樵山人

海樵山人雙紫髯
道上相逢開石函
贈我芙蓉千萬片
至今秋色滿江南

涇縣望桃花潭

即李白題詩
贈汪倫處

桃花潭水近陵陽
潭上春風滿石梁
流水不隨仙客去
秦人何必渡三湘

仙人石

秋風夜渡仙人石
百尺竒峯掃天碧
我欲捫蘿枕石眠

明月偏醉廣陵客

王子夜半來過席間有贈走筆相答

秋雷一動蛟龍走玉生夜半尋五斗把酒向天天忽開
星辰錯落亂吾手

夜名明御報言病目畏燈火走筆戲簡二絕

秋雲落盡瀟湘曲更有何人抱寒玉堂前銀燭豈黃塵
相逢不肯開君目

昨日見君雙眼青今日見君雙眼赤江南百戰天地摧

豈應欲化萇弘碧

人日大雪峻伯助甫來過賦得榆愁門陽四字
七日之春春可呼相逢斗酒醉屠蘇却疑金勝天門墮
把向階前成白榆

已知青帝坐青陽玄冥使者猶飛揚不是春風吹不去
知吾欲跨白虹翔

春色尚閉楊柳園楊花柳絮何翩翩
疑是玉龍來叩門

凍雲裂破青春流
天門牛女爭春愁
剪碎銀河幾萬片
一宵白盡青山頭

席上酬助甫

檻外春雲控紫駟
腰間明月冷吳鉤
酒酣把贈天風起
吹作湘江白鷺秋

助甫宅見盆梅同子藩賦之得東愁二字

徑尺蒼虬墜碧空
天風吹作玉玲瓏
尊前明月爭相拾
恐逐仙人過海東

斗室梅花玉笛愁相逢疑在赤城頭何當擲爾瀟湘去
處處鮫人驚白鷗

白雲樵者

赤城花落掃春氛夜夜仙人弄白雲
雜佩幽蘭何處得洞庭明月問湘君

十日峯頭摘白雲月華相逐夜繽紛
曉來片片晴虹氣恐是仙人素練裙

青霞樵者贈助甫

何處樵人拾古沙
石門風雨閉桃花
相逢為製秋江笠
摘盡峯頭萬片霞

宗子相集卷十一